

四庫全書

史部

欽定四庫全書

翰林記卷十二

明 黃佐 撰

收藏秘書

按周禮太史掌建邦之六典外史掌四方之志三皇五
帝之書漢圖籍所在有石渠石室延閣廣內藏之於外
府又有御史居殿中掌蘭臺秘書及麒麟天祥二閣藏
之於內禁後漢圖書在東觀置秘書監又有鴻都等處
唐有秘書監集賢院宋建昭文史館集賢院置大學士

直學士修撰等官以掌之又有秘書省崇文館其重如此聖祖甫定天下即遣使求遺書國初四庫之書多藏文華堂堂在禁中抵奉天門下百武車駕嘗幸臨之洪武三年三月庚子置秘書監秩正六品先除監丞一員直長二員十三年七月癸巳以內府書籍已有本院典籍掌之於是罷秘書監典籍張敏行者掌書籍中使傳宣索書即啓鑰以上時時得燕見聖祖稽古右文其勤如此蓋罷掌書之官併其任於翰林實自此始今內閣

史館凡御製文字宸翰列聖實錄及玉牒副本經史子集類書之屬皆在焉永樂四年四月上視朝之暇輒御便殿閱書史或召翰林儒臣講論嘗問文淵閣經史子集備否學士解縉對曰經史粗備子集尚多闕上曰士人家稍有餘貲皆欲積書況於朝廷可闕乎遂召禮部尚書鄭賜令擇通知典籍者四出購求遺書且曰書籍不可較價直惟其所欲與之庶竒書可得又顧解縉等曰置書不難須常覽閱乃有益凡人積金玉亦欲遺子

孫金玉之利有限書籍之利豈有窮也十六年遣修撰陳循往南京起取本閣所貯古今一切書籍自一部至百部以上各取一部北上餘悉封識收貯蓋兩京皆有儲書也十九年四月庚子夜奉天華蓋謹身殿災火勢猛烈而奉天門東廡切近秘閣學士楊榮奮身直入麾武士三百人將御書圖籍并積歲制勅文書舁至東華門河次明日上召諭之曰昨夜火發在目前者幾人卿能收拾御書圖籍不避艱危可謂難矣因褒賞之是時

書籍淆亂無紀典籍周翰理淆葺亂逾二載而後復舊
今館閣書目蓋永樂間定也自正統以前凡官本院者
每朝退即入閣中檢所未見書蓋館閣無政事以討論
考校為業故得縱觀中秘而受命進學者亦與焉景泰
時編修周洪謨輩尤出入自恣始為內閣所局鑰弘治
五年五月大學士丘濬請訪求遺書言太祖於丙午年
已求遺書既平元都得其館閣秘藏而又廣購於民間
没入于罪稽一時儲積不減前代然藏畜數多不無亂

雜積歷年久不無鼠蠹經該人衆不無散失今因內閣
儲書有匱書目有簿皆可查考乞勅內閣量要學士并
講讀以下官督同典籍撥與吏典班匠人等將書目校
讐有無全欠分為經史子集四類及雜書類書二類開
具奏報仍刻考校年月委官名銜識於卷末立案存照
又勅兩京內外大臣會同南京禮部本院官查盤永樂
中原留南京內府書籍有無全欠具數奏知於凡兩京
書籍令兩京國子監謄寫各令兩監藏之以備遺失夫

國家採輯佛道書以為藏經雕以文梓飾以文綾徧賜天下寺觀儲以緜紅函匱載以金碧輪藏況此書籍乃自帝王傳心之要道經世之大典禮樂刑政制度文為之所具烏可吝惜小費而不為經久之計哉請勅內閣將書目付禮部抄謄分送直隸十三布政司督提學校憲臣用心設法訪求抄寫送京以補所未備仍於內閣近便去處別建重樓一所專用甃石累砌如民間所謂土庫者令內閣書辦中書等官遇其閒暇抄謄累朝實

錄各一部盛以銅匱于樓之上層凡內府衙門收藏國家大事文書如玉牒之類皆附焉其制勅房一應文書如詔冊制誥勅書等項并檢行禮儀註應制詩文等項底本前朝遺文舊事等項雜錄亦各抄一部盛以鐵匱貯於樓之下層凡內府衙門所藏文書可備異日纂修一代全史之用者如永樂以前文武官貼黃之類皆附焉苟無禦災備急之具一或散失後之秉史筆者無所憑據往往求之於草澤訪之於傳聞簡牘無稽真贋莫

辨非但大功異政不得紀載而明君良臣為人所誣捏者亦有之矣至若列聖實錄及聖祖御製等書請依洪武六年纂集日歷以為寶訓事例勒成一書頒行天下如此則祖宗之功德在萬世永傳信而無疑國家之典章垂百王遞沿襲而有本所謂金匱石室豈虛文哉奉聖旨太祖御製書籍著翰林院官打點見數收貯南京書籍查照目錄開寫缺少的去著守備同南京禮部翰林院點檢送來天下遺書禮部行移南北直隸十三布

政司訪求其餘罷然是時有司不能如命遂因循至今
正德中為人盜竊殘缺日甚論道講學尚何所資耶言
之可為拊膺不無有望於今日也

開局纂修事始

國初名儒臣載筆以定有天下之制分三局以總之一
曰律局以定律令凡舊官之練憲典者居焉二曰禮局
以究禮儀凡宿儒之通古制者居焉三曰誥局以撰誥
命凡俊材之優文辭者居焉此開局之始也汪克寬曰

洪武元年命中書省翰林太常率諸儒定擬三禮明年再命集議禮樂又明年徧徵在野道德文章之士分局相與訂正之亦正指此其後纂修國史每分為十館以均六局之多寡六局一曰吏以究人材之進退二曰戶以量地利之盈縮三曰禮以考禮儀之沿革四曰兵以載軍政之臧否五曰刑以書刑罰之詳濫六曰工以審力役之糾緩皆本六官職掌為之十館所修不能統一則揔勘如修他書則有不盡然者蓋自罷起居注之後

本院職專文史遇有纂修旋設館席給筆札惟官長凡例是遵逐事呈稿筆削惟命其中雖有所見亦不敢盡用已意蓋官局修書從古然也

監修

洪武二年二月丙寅朔勅修元史以中書左丞相宣國公李善長為監修不預史事三十五年十一月己未重修太祖高皇帝實錄勅太子太師曹國公李景隆為監修都總裁官太子少保兼兵部尚書忠勤伯茹瑄為副

監修官永樂九年十月又重修之勅戶部尚書夏原吉
太子少保姚廣孝監修未及成而廣孝死原吉獨專其
事洪熙元年五月庚午朔勅修太宗皇帝實錄閏七月
甲辰勅修仁宗皇帝實錄俱以太師英國公張輔少師
兼吏部尚書蹇義少保兼太子少傅戶部尚書夏原吉
監修自永樂以來多豫秉筆與國初不同宣德十年九
月庚午勅修宣宗皇帝實錄止用張輔為監修始復不
預秉筆矣監修英宗皇帝實錄者會昌侯孫繼宗監修

憲宗皇帝實錄英國公張懋監修孝宗皇帝實錄者亦懋也若修他書則罕設惟永樂元年七月修永樂大典以太子少師榮國公姚廣孝禮部尚書鄭賜為監修刑部左侍郎劉季麓副之餘不可盡考

總裁

國初修元史以前起居注宋濂漳州通判王禕為總裁未幾濂進學士禕拜待制三年二月乙丑續修元史仍為總裁太祖皇帝實錄總裁者始為禮部左侍郎兼學

士董倫與侍講方希直重修李景隆與侍讀解縉再重修則文淵閣大學士兼左春坊大學士胡廣學士兼右庶子楊榮祭酒兼侍講胡儼也太宗仁宗兩朝實錄總裁為少傅兵部尚書兼華蓋殿大學士楊士竒太子少傅工部尚書兼謹身殿大學士楊榮太子少保禮部尚書兼武英殿大學士金幼孜戶部尚書兼武英殿大學士陳山禮部尚書兼華蓋殿大學士張瑛太常寺卿兼學士楊溥自是其柄始盡歸館閣矣宣宗皇帝實錄總

裁為少傅工部尚書兼謹身殿大學士楊榮行在禮部
尚書兼學士楊溥總裁兼纂修為少詹事兼侍讀王直
少詹事兼侍講學士王英總裁兼纂修前此未有也英
宗皇帝實錄總裁為少保吏部尚書兼華蓋殿大學士
李賢禮部尚書兼學士陳文兵部尚書兼學士彭時副
總裁為禮部右侍郎李紹太常寺少卿兼侍讀學士劉
定之吳節副總裁蓋自此始紹雖為侍郎然發身則自
翰林故與馬憲宗皇帝實錄總裁為少傅兼太子太師

吏部尚書謹身殿大學士劉吉禮部尚書兼文淵閣大學士徐溥禮部右侍郎兼學士劉健副總裁為禮部尚書丘濬詹事兼侍講學士汪諧孝宗皇帝實錄總裁為少師兼太子太師吏部尚書華蓋殿大學士李東陽少傅兼太子太傅吏部尚書謹身殿大學士焦芳戶部尚書兼文淵閣大學士楊廷和副總裁為吏部左侍郎兼學士梁儲若纂修日歷惟洪武時有之總裁為學士承旨兼吏部尚書詹同侍讀學士宋濂聖祖所修諸書多

不可考獨太宗時永樂大典分局皆有總裁學士解縉
修撰吳溥檢討王洪禮部郎中鄒濟布衣陳濟等皆得
為之無慮十餘人蓋門彙多而事實繁故也大明一統
志總裁為吏部尚書兼學士李賢太常寺少卿兼學士
彭時學士呂原副總裁為學士林文劉定之侍讀學士
錢溥大明會典總裁為大學士李東陽焦芳楊廷和副
總裁為學士梁儲若四書五經性理大全宋元資治通
鑑綱目等書多不設總裁止用纂修官

纂修

國初纂修皆用山林隱逸之士洪武日歷纂修者皆儒
士職官獨員外郎吳伯宗一人戊寅年勅修太祖皇帝
實錄纂修可考者為侍讀學士兼太常寺少卿高遜志
太常寺少卿廖昇都察院左僉都御史程本立禮部郎
中夏止善修撰李賈編修吳溥楊子榮劉觀檢討陳性
善侍書劉彥銘史官高讓吳勤趙友士端孝思張秉彝
唐畔畊國子博士王縉僉事胡子昭知縣葉惠仲儒士

楊士奇等永樂初重修太祖實錄纂修為學士禮部尚書李至剛侍讀胡靖曾日章王灌胡儼侍講鄒緝楊榮金幼孜楊士奇修撰李貫編修吳溥鄭好義檢討王洪博士張伯頴王汝玉典籍沈度潘畿待詔王延齡給事中朱絃吏部郎中徐旭禮部郎中胡遠太常寺博士錢仲益國子助教王達博士金玉鉉行人蔣驥晉府伴讀蘇伯厚僉事李宜葉砥知府劉辰靖江府教授張顯楚府教授吳勤知府鄒濟知縣楊觀梁潛王褒沈瑜趙委

通唐雲教諭解榮劉宗平訓導富貴清羅師程儒士端
禮王孟易朱逢吉莫士安凡外官生儒之預此者皆由
本院官舉薦及再重修其纂修者學士兼諭德金幼孜
楊士奇侍講學士曾榮侍讀兼贊善梁潛侍講王英修
撰羅汝敬刑部主事李時勉陳敬宗也太宗仁宗兩朝
實錄纂修官為左春坊大學士兼侍讀學士曾榮右春
坊大學士兼侍講學士王英右春坊右庶子兼侍讀王
直左春坊左諭德兼侍讀周述侍讀李時勉錢習禮侍

講余學夔陳循蘭從善蔣驥修撰苗衷曾鶴齡張洪劉
永清編修周叙孫曰恭揚敬檢討周翰王雅揚翥五經
博士陳繼戶部主事陳中四川道御史陳叔剛福建右
參議潘文奎知縣萬節教授丘錫教諭梁萼蓋自是不
復用儒士矣宣宗皇帝實錄纂修官為侍讀學士李時
勉錢習禮侍講學士陳循洗馬蘭從善侍讀苗衷曾鶴
齡馬愉侍講高穀胡種邢寬修撰周叙尹鳳岐孫曰恭
習嘉言陳詢陳叔剛曹鼐儀銘王一寧杜寧儲懋編修

楊翥董璘楊壽夫林文鍾復主事劉珪洪璵劉球與評
事張益御史邵宏譽英宗皇帝實錄纂修官為學士柯
潛萬安侍講學士李泰太常寺少卿兼侍讀孫賢劉珣
左諭德黎淳右諭德童緣劉宣侍講江朝宗楊守陳修
撰王一夔彭教編修尹直徐瓊陳秉中李永通鄭環劉
健汪諧張元禎吳鈺羅璟檢討耿裕周經纂修兼校正
官為侍讀劉吉陳鑑侍講丘濬編修彭華蓋自是專用
本院及詹事府官而纂修兼校正始見於此憲宗皇帝

實錄纂修官為太常寺少卿兼侍讀傅瀚少詹事兼侍
讀費閻左庶子兼侍讀謝遷右庶子兼侍講陸簡侍讀
曾彥楊守卬侍講劉戩王鏊楊傑梁儲左贊善張元禎
修撰劉機武衛張芮編修劉忠鄧燝黃珣張天瑞劉春
涂瑞檢討楊時暢纂修兼校正官為南京國子監祭酒
李傑左庶子兼侍講學士李東陽左庶子兼侍讀吳寬
右庶子兼侍講董越纂修兼參對官為修撰楊廷和編
修江瀾纂修兼參對亦始見於此孝宗皇帝實錄纂修

官為侍讀毛紀傅珪朱希周侍講豐熙沈燾吳一鵬修撰顧鼎臣編修王俊李廷相溫仁和李時滕霄何塘董玘檢討汪偉王九思潘辰至於修他書者不能盡記大率成化以後纂修皆純用本院官而永樂大典四書五經性理大全寰宇通志庶吉士亦得與焉

催纂

洪武日厯設催纂官以侍講學士樂韶鳳為之永樂初重修太祖實錄催纂兼謄寫為禮部主事陸顥瑞端孝

思始不用本院官宣德初太宗仁宗兩朝實錄因之以
禮部主事張習為催纂宣宗實錄則又不同編修蕭鎡
賴世隆吳節徐理檢討李紹王汝玉姜洪何宣主事潘
勤正字沈寅俱為稽考參對并催纂官英宗實錄以編
修李東陽倪岳謝鐸焦芳陳音程敏政檢討吳希賢吏
部驗封司員外郎韓定中書舍人馬麟焦瑋李溥俱為
催纂官憲宗實錄以吏部員外郎李通中書舍人胡清
為催纂官蓋自此專用制勅房誥勅房官云

稽考參對

稽考參對太宗仁宗兩朝實錄以修撰邢寬蔣禮胡種
編修陳詢劉矩裴綸梁禔孔目沈寅為之蓋纂修之次
也然寬乃永樂甲辰進士第一禔次之孫曰恭又次之
寬禔同為稽考參對而曰恭乃得纂修此類最多有不
可曉者宣宗實錄稽考參對與催纂并為一事英宗實
錄因之止以催纂為名憲宗實錄以纂修者兼校正或
兼參對孝宗實錄稽考參對者修撰呂柟編修崔銑湛

若水翟鑿徐縉景暘檢討段昞易舒誥穆孔暉張邦奇
焦黃中胡纘宗也蓋至是始復專設其賞格與催纂同

騰寫

洪武中修日歷騰寫用舉人監生永樂初重修太祖實
錄以催纂者兼騰寫官其騰寫用監生生員儒士凡二
十五人太宗仁宗兩朝實錄改騰寫為騰錄用檢討許
彬連智馬信周貴等四人中書舍人蕭湘等十八人郎
中員外郎主事寺副等官程雲南等九人儒士生員各


一員凡三十三人宣宗實錄有謄錄正副本官用郎中
員外郎主事寺正評事侍書冠帶秀才監生生員秀才
凡二十九人又有謄藁官焉修撰黃裳編修許彬周貴
中允蔣禮郎中何賢夏衡寺副石慶姚本溫良英宗實
錄謄錄有太僕寺卿余濂山東左參議林章禮部郎中
吳謙等中書舍人凌暉等又有鴻臚主簿王佑白真序
班毛顯本院譯字官胡清徐德王臣凌遠與監生生員
秀才之屬共三十五人官雖不同大率皆制勅誥勅二

房辦事者也憲宗實錄亦如之自太常寺卿林章等以及監生許鑒等三十四人孝宗實錄謄錄者太常寺少卿沈冬魁等以及秀才張保等三十六人

收掌一應文籍

太宗仁宗兩朝實錄收掌一應文籍者為檢討胡讓典籍李錫牛麟張禮宣宗實錄則為修撰胡讓寺副陳紀中書舍人靳通英宗實錄則為光祿寺署丞冀舞鴻臚寺主簿高鑑憲宗實錄則為鴻臚寺主簿靳塘本院孔

目張翰自催纂而下若修他書多不可考姑闕之以俟
續書



翰林記卷十二

欽定四庫全書

史部
翰林記卷十三至
六

詳校官太常寺少卿臣陳桂森

編修臣程嘉謨覆勘

總校官原任中允臣王燕緒

校對官編修臣王嘉曾

謄錄監生臣許蔭培

欽定四庫全書

翰林記卷十三

明 黃佐 撰

修日歷寶訓

聖祖時設起居注後惟專設本院史官常諭學士詹同等曰國史貴直書是非善惡昔唐太宗觀史命直書建成之事其意欲以公天下也予平日言行可記其是非善惡汝等皆當明白直書勿為隱諱庶使後世觀之不失其實洪武六年七月壬寅學士承旨兼吏部尚書詹

同等言自上起兵渡江以來征討平定之績禮樂治道之詳雖有紀載而未成書乞編日厯藏之金匱傳之後世上從其請八月甲申上御東黃閣命同與侍講學士宋濂為總裁官侍讀學士樂韶鳳為催纂官員外郎吳伯宗儒士朱右趙壘朱廉徐一夔孫作徐尊生同纂修鄉貢進士黃昶國子生陳益暘等謄寫九月四日開局於西華門內分年纂輯日輪寺人守閣大官進膳羞其事甚嚴且秘同等味爽而入至日曛始出復會宿於詞

林虞有宣洩不敢不慎也十二月擢右壘廉為編修作
為太平府教授一夔輩以病乞歸許之七年五月丙寅
朔纂修大明日歷成自上起兵泗濠至即位六年癸丑
冬十二月凡征伐次第禮樂沿革行政設施羣臣功過
四夷朝貢之類莫不具載合一百卷同等率諸儒上進
命藏之金匱其副藏於秘書監同與廉又言於上曰日
歷藏之天府人欲見之有不可得臣請依唐太宗貞觀
政要分類更輯聖政為書以傳天下後世從之於是分

為四十類自敬天至制蠻夷釐為五卷總四萬五千五百餘言名曰皇明寶訓自是以後凡有聖政史官紀錄之隨類增入按永樂以後日歷之修遂廢學士王直在館閣私自紀述及纂修太宗實錄輯以為寶訓然列聖以來所謂實錄寶訓大都出于繼世之後旁蒐汎索盖有不得其真者矣詹宋所言足為成憲誠使史館載筆之臣日事編纂則所謂紀言動者不至鰥官而後世觀之足以傳信也

修實錄

洪武三十一年九月勅修太祖高皇帝實錄不知成於何年始不可考三十五年十月己未勅景隆等重修庚申諭修實錄官曰此建文中信用方孝孺等纂述實錄任其私見以致盛美弗彰爾等其以古良史自期必詳必公用光昭我皇考創業垂統武功文治之盛與乾坤相為無窮斯無忝厥職矣永樂元年六月辛酉景隆等以實錄成表上之凡一百八十三卷大行賞賚仍賜宴

奉天門命公侯伯五府六部都察院通政司大理寺國
子監應天府太醫院欽天監堂上官皆預焉九年十月
上以太祖實錄建文時修多失其實永樂初再修亦倉
卒未備命史臣重修勅戶部尚書夏原吉與太子少師
姚廣孝監修學士胡廣楊榮等為總裁金幼孜等與纂
修未幾廣孝死原吉獨專其事凡七年始成十六年五
月庚戌朔原吉等以實錄進凡若干卷共二百五冊寶
訓凡若干卷十五冊上御奉天殿受之披閱良久嘉獎

再四曰庶幾少副朕心辛亥賜宴于禮部洪熙元年五月庚午朔勅修仁宗實錄宣德五年正月壬戌書成太宗實錄凡一百三十卷一百二十四冊寶訓凡若干卷十五冊仁宗實錄凡十卷二十冊寶訓凡若干卷六冊太師英國公張輔等表上之上御奉天殿受馬癸亥賜宴于中府賞賚如永樂時宣德十年九月庚午勅修宣宗皇帝實錄賜宴禮部正統三年四月己巳實錄成凡一百一十五卷一百一十六冊寶訓凡十二卷十冊太

師英國公張輔等具表上御奉天門慰勞再三加陞賞
焉賜宴於禮部一云西苑天順八年三月勅修英宗皇
帝實錄附以景泰時事成化三年八月實錄成凡若干
卷三百六十冊寶訓凡若干卷十二冊邸戾王附太保
會昌侯孫繼宗等具表上進成化二十二年二月勅修
憲宗皇帝實錄弘治四年八月實錄成凡若干卷二百
九十三冊寶訓凡若干卷十冊太傅兼太子太師英國
公張懋等具表上進弘治十八年五月勅修孝宗皇帝

實錄正德四年五月實錄成凡一百二十四卷若干冊
寶訓凡十卷若干冊太傅兼太子太師英國公張懋等
具表上進自成化以來宴賚一如故事進實錄儀則具
載會典云按國初儒臣徐一夔曰元朝制度文為務從
簡便且聞史事尤甚疎畧不置日歷不置起居注獨中
書置時政科以一文學掾掌之以事付史館及繼世之
後則國史院據所付修實錄而已詹事楊守陳在史館
嘗言古人謂國可滅史不可滅我太祖定天下即命儒

臣撰元史太宗靖內難其後史臣不紀建文君事遂使
建文數年朝廷政事及當時忠於所事者皆湮沒不傳
及今采輯尚可補國史之缺景皇帝已復位號而英宗
實錄標目猶書郕戾王附是宜改正舊例羣臣章疏留
中者雖有可傳皆不得書乞以留中之奏悉付史館擇
而書之蓋國初修纂聖政以為日歷故言動猶詳後之
所據以為實錄者惟中外臣僚章疏與所行事例焉耳
二人所論良足箴也

焚藁

凡進呈實錄之日其草稿內閣大臣會司禮監官於內
府燒燬李東陽曰正德四年五月二十五日在海子西
岸焚實錄稿事畢尚膳供宴是日入西苑門望南臺登
廣寒殿過芭蕉園而還是時焚稿例供宴也

修玉牒

凡玉牒每十年一次宗人府具各王府宗支開報內閣
奏請學士等官二員纂修其修合用紙割洪熙元年勅

司禮監別造本院委官一員公同附注宣德三年命本院一員同宗人府經歷於史館內附寫其後合用紙劄弘治十年命刑部關領附注之日令吏部撥辦事吏三名宣宗宣德五年四月重修玉牒成少傅楊士奇太子少傅楊榮以進上覽之因言國家族屬之盛士奇等請遠法帝堯明峻德以親九族上以為然孝宗時太常寺少卿兼侍講學士楊時暢進玉牒按宋制於正殿登受前此所未有也

修書

洪武中稽古右文以開至治故纂述之事殆無虛日元年六月命禮部尚書陶凱輯自古太子諸王之嘉言善行為書既成上未慊意更令修撰王僕等刪定之二年二月書成凡一百一十餘條為二卷賜名昭鑒錄又命學士朱升等同本院儒士修女戒是年三月辛未朔書成四年七月存心錄成六年三月宋濂進辨姦錄分賜皇太子親王濂嘗被命輯自古奸宄之迹為書至是進

呈七年九月孝慈錄成命翰林定服制也十三年五月
臣戒錄成先是上命本院儒臣纂錄歷代諸侯王宗戚
宦官之屬悖逆不道者二百二十人備其行事以類書
之既成賜今名命頒布中外十四年五月朔編修吳沉
典籍劉仲質吳伯宗進千家姓凡為姓一千九百六十
有八十六年二月東閣大學士吳沉等進精誠錄類編
聖賢所言三事曰敬天曰忠君曰孝親十八年三月省
躬錄成初上命翰林儒臣編集歷代帝王祭祀祥異感

應可為鑒戒者為書名曰存心錄朝夕觀覽後復命贊善劉三吾編類漢唐以來災異之應於臣下者別為一書名曰省躬錄至是成詔頒行之二十一年九月頒武士訓戒錄亦翰林儒臣所修也二十六年諸司職掌成先是命吏部同本院儒臣倣唐六典自五府六部都察院以下職務類編為書至是成刊布中外又嘗詔本院稽考漢唐宋功臣封爵食邑多寡及名號虛實等第為書名曰稽制錄至是亦頒示功臣十二月永鑑錄成頒

賜諸王世臣總錄成頒示中外羣臣皆本院儒臣所修也二十七年七月寰宇通志成時上以輿地之廣不可無書以紀之乃命本院儒臣及廷臣以天下道里之數總類為書復編洪武誌書二十八年十二月成刊行之二十九年十一月頒稽古定制亦翰林儒臣所定勛舊食祿之家禁例禮節也他如皇明祖訓大誥三編大誥武臣資世通訓御製詩文御註洪範御註尚書御註道德經皆出宸衷而令本院儒臣商確之又有志戒錄忠

義錄為政要錄彰善癉惡錄武臣鑑戒醒貪簡要錄務
農技藝簡要錄大率皆翰林院所修而年月莫考洪武
戊寅嘗詔編輯經史百家之言為類要侍讀唐愚士等
纂修未成永樂元年七月上諭侍讀學士解縉等曰朕
欲悉采各書所載事物類聚之而統之以韻凡書契以
來經史子集百家之書至於天文地志陰陽醫卜僧道
技藝之言備輯為一書毋厭浩繁於是廣召四方儒者
許侍臣各舉所知至三年正月開局纂修命太子少師

姚廣孝禮部尚書鄭賜監修刑部左侍郎劉季篪副監
修賜卒以贊善梁潛代焉其總裁副總裁纂修等無慮
數百人書成名曰永樂大典元年九月勅諭翰林儒臣輯
自古嘉言善行有益於太子以儲君昭鑑錄為主稍充
廣之名曰文華寶鑑二年四月書成上御奉天門召皇
太子授焉又命解縉等編次古今后妃諸侯大夫士庶
人妻之事分為三卷元年十一月進御賜名古今列女
傳上親序之頒之六宮行之天下時庶吉士余鼎輩讀

書文淵閣上命編纂君臣父子諸格言各為類名曰聖
學心法七年二月書成亦親序之出示學士胡廣等因
命司禮監刊印又以璽書諭皇太子令學士黃淮楊士
竒等採古名臣直言并奏疏彙類以便觀覽十四年十
二月書成賜名歷代名臣奏議遂命刊印以賜皇太子
皇太孫及大臣十六年六月乙酉詔修天下郡邑志書
命學士楊榮等總之戶部尚書夏原吉提調上嘗巡北
京以仁宗隨行道途所經過農家編覽農具及其衣食

且諭以農民勤苦之事曰此為帝王者不可不知也遂
作務本之訓以授仁宗又為善陰隲孝順事實二書以
風厲天下雖出御製而本院儒臣亦與聞焉宣德元年
正月乙卯勅修歷代臣鑒外戚事鑒皆命大學士楊榮
總之且諭榮以書館中編纂及繕寫官有不遵約束者
悉聽稽督責罰敢有違越者具聞黜之榮處之適當人
皆悅服二年九月書成頒賜在廷諸臣及戚畹又詔修
五倫書正統十年三月書成景帝時勅修君鑑及寰宇

通志成英宗復辟以寰宇通志多汎濫勅本院儒臣約
為一統志天順五年五月大明一統志成上親序之憲
宗時肇建東宮詔修文華大訓本院官預者惟學士王
獻侍講學士楊守陳侍讀倪岳等四人篇目條例多本
大學衍義獨事涉中人者悉不以書守陳爭曰是何以
為訓撮其賢否得失之故分註一條議者不能奪成化
十八年二月文華大訓成上親授諸皇太子令宮臣進
讀弘治十年三月詔修大明會典大學士李東陽焦芳

等總之其凡例本諸司職掌而旁及諸制書以官職制
度為綱事物名數儀文等級為目每有事例因草損益
皆詳載焉十五年十二月書成凡一百八十卷上親為
序正德六年四月司禮太監張永傳奉聖旨命儒臣重
加參校十二月大學士李東陽以重校大明會典表上
之武宗復為序始纂修時學士王鏊欲如唐六典之本
庶潤色有文簡明易見總之者不能從也一代之制雖
云具備然宮中所設職掌皆未詳載豈當時中人之謫

方煽與重加改正懸諸象魏以為法守在今日而已凡進書例有表上其儀見會典

修史

洪武二年二月丙寅朔詔修元史以中書左丞相宣國公李善長為監修前起居注宋濂漳州府通判王禕為總裁徵山林遺逸之士汪克寬胡翰宋禧陶凱陳基趙璫曾魯高啓趙汭張文海徐尊生黃麓傅恕王錡傅著謝徽十六人同為纂修開局于天界寺取元經世大典

諸書以資參考時方名諸儒考禮於是儒士徐一夔梁
寅周子諒胡行簡劉宗弼董彝恭深滕公琰時曾魯輩
以元史方成共奏留之因命與諸儒同纂修九月元史
成紀三十八卷志五十三卷表六卷傳六十二卷濂等
表上之惟元統以後尚缺三年二月乙丑詔續修元史
時儒士歐陽佑等采摭元統以後實事還朝仍命濂與
待制王禕總裁儒士趙堦朱右貝瓊朱世廉王彛張孟
兼高遜志李懋張宣李文張簡杜寅殷弼俞同十四人

同纂修七月丁亥朔續修元史成計五十三冊紀十志
五表二列傳三十六凡前書未備者悉補完之通二百
十二卷濂等率諸儒以進詔刊行之人賜白金二十兩
文綺帛各二授儒士張宣等官各有差惟趙堦朱右朱
濂乞還田里從之後令解縉還家著述十年乃復來朝
因命改修元史之舛誤及踵成宋書刪定經禮凡例皆
以留中未幾縉以太祖大喪入朝進香被謫書蓋未成
也成化八年十月詔修宋元通鑑綱目十二年十一月

成凡若干卷大學士商輅等表上之弘治十六年三月
詔修歷代通鑑纂要正德六年十月成凡若干卷大學
士李東陽等表上之二書皆上親為序蓋纂修之事
必集衆長而後可成正統中南京侍讀學士周叙獨受
詔修宋遼金三史未及成而卒至今猶為缺典顧此非
一人精力所能就雖開局可也

訂輯經傳

經書註釋言人人殊自國朝訂輯之而後五經六籍益

明於世洪武六年詔修撰孔克表御史中丞劉基秦府
紀善林溫取諸經要言以恒言釋之使人易曉因手釋
二章賜克表為例克表等承詔釋四書五經以上賜名
羣書類要聖祖嘗覽蔡氏書傳指摘其可議者二十四
年十一月禮部右侍郎張智等奉命同學士劉三五等
會議改正蔡氏書傳并定程文格式頒行天下學校其
改正之說曰前元科舉尚書專以蔡傳為主考之傳內
如天文一節已自差繆謂日月隨天而左旋今仰觀乾

象甚為不然夫日月五星之麗天也除太陽則人目不能見其形於列宿之間其太陰與五星昭然右旋何以見之當天清氣爽之時借一宿為主使太陰居列宿之西一丈許盡一夜則太陰過而東矣蓋列宿附天舍次定而不動者太陰過東則其右旋明矣夫左旋者隨天體也右旋者非天體也又如五星右旋為順行左旋為退行其順行之日常多退行之日間有若依蔡氏之說則退行多而順行少豈理也哉皆乾象昭然有目之所

共見蔡氏不知而妄為異說以致愚惑後世之愚儒俗士又皆誦習紙上之文莫有能仰觀天象以究其非者若不草正有誤方來今後學學尚書者天文一節當依朱氏詩傳十月之交註文為是又如洪範內惟天陰隲下民下民相協厥居一節蔡氏俱以天言殊不知陰隲下民乃天之事相協厥居乃人君之事天之陰隲下民者何風雨霜露均調四時五穀結實立烝民之命此天之陰隲也君之相協攸居者何敷五教五典以教民以五刑

而弼教保佑和協使強不得凌弱衆不得暴寡而各安其居也若如蔡氏之說則相協之事皆付之於天而人君但宴安自若於奉天勤民之政略不相與又豈天佑下民作之君師之意哉今後當依此說二十七年四月復詔徵儒臣考正蔡氏書傳於是太子少保唐鐸等舉致仕編修張美和國子監博士錢宰等二十七人皆宿儒也並遣行人馳傳徵之既至上語以正定書傳之意且曰爾等知天象乎皆對曰不知上曰朕每觀天象自

洪武初有黑氣凝於奎壁奎壁乃文章之府朕甚異焉今年春暮其間黑氣始消文運始興爾等宜考古正今有所述作而稱朕意於是命三吾等總其事開局翰林院至九月書成三吾等率諸儒上進賜名曰書傳會選命禮部刊行天下賜諸儒綺繒衣物等并御製詩燕享命坐殿中瀕行又賜寶鈔俾馳驛而還上又嘗謂孟子一書不可汎觀二十二年四月詔集耆儒錢宰等二十七人命劉三吾總之參訂孟子纂其要語刪去八十五

條至九月書成進御命之曰孟子節文尋又命三吾訂
正周禮上躬與之裁定蓋由聖心沉潛經術既久故能
探賾詣極以成書永樂十二年十一月甲寅上諭學士胡
廣楊榮金幼孜曰五經四書皆聖賢精義要道傳注之
外諸儒議論有發明者爾等宜采附于下周程張朱諸
君子性理之言如太極圖通書西銘正蒙之類皆六經
羽翼然各自為書未有統會卿等宜類聚成編務極精
備用垂永久命廣等三人總其事仍舉朝臣及在外教

官有文學者同修開館東華門外命光祿寺給朝夕饌
甚豐十三年九月己酉書成賜名性理大全廣等表上
之上親為序冠其首詔頒于六部兩京國子監及天下
學校按聖祖命劉三吾定科舉取士之制四書義主朱
氏集註章句易主程氏傳朱氏本義書主蔡氏傳及古
註疏後主會選詩主朱氏集傳春秋主三傳及胡氏張
洽傳禮記主古傳疏廣等所定惟四書及易詩如舊書
主蔡氏春秋主胡氏禮記主陳澔集說嘗求其故蓋當

時編纂惟據元人四書五經性理會通稍加刪潤而成
非為異也

校勘書史

洪武中本院儒臣校勘書史進御日以為常蓋聖祖好
學手未嘗釋卷故也仁宗在東宮嘗命侍講楊士奇贊
善陳濟校讐歐陽修文集正其誤補其闕釐為一百五
十三卷命刻以傳成化中本院官受命校勘資治通鑑
綱目貞觀政要二書翻刻以賜在廷大臣正德時命重

校大明會典語見前餘多莫攷

修書陞賞

凡書成進御例有陞賞酬勞也洪武中修元史及書傳會選陞賞見前然擢用皆儒臣之未授官者若本院官則賞而不陞蓋以文墨特其職分之常故爾永樂元年六月癸亥太祖皇帝實錄成侍讀學士解縉傳於奉天門欽奉聖旨修史官除翰林院及尚書李至剛外其餘官員監生生員人等說與吏部引選發落欽此丙寅

吏部將修史郎中等官同儒士監生生員吏部引選詔以郎中等官徐旭等各陞一級儒士監生生員吏員王孟易等除授主事御史中書舍人并都事等官有官者修史得陞擢始見於此于是以吏部郎中徐旭為國子監祭酒太常寺博士錢仲益知縣楊覲梁潛王褒為修撰國子助教王達給事中朱紘為編修行人蔣驥為檢討國子博士金玉鉉為五經博士晉府侍讀蘇伯厚為侍書教諭解滎劉宗平為待詔靖江府教授張顯為國

子監學正訓導富貴清羅師程為國子監學錄知府劉
辰為江西右叅政禮部郎中胡遠為江西左叅議廣東
僉事李宜為福建左叅議僉事葉砥改吏部考功郎中
知州鄒濟改禮部儀制郎中知縣趙季通例應陞而以
疾乞教職授國子博士知縣唐雲改監察御史楚府教
授吳勤改開封府學教授陞騰寫官主事陸顯為禮部
員外郎瑞孝思為兵部員外郎擢監生鍾子勤陳彝訓
劉謙沈文為中書舍人梁逢吉葉蕃沈紹先華嵩喬岳

衛談鄭中余從善陳俊良陳實為監察御史生員金實為翰林典籍汪琦等十人為知縣而纂脩儒士王孟易端禮朱逢吉莫士安陞授莫考以聖詔推其次第蓋授主事云十六年再重修太祖實錄成改纂修主事李時勉陳敬宗為侍講監修以下賜金帛鈔幣紗衣有差太宗仁宗兩朝實錄吏部據行在翰林院備開修史官員人等姓名具題請旨奉聖旨曾祭王英王直都陞少詹事支正四品俸仍兼原兼職事周述陞庶子支正五品俸仍

兼原兼職事李時勉錢習禮都陞侍讀學士余學夔既告老疾著冠帶回去間住陳循蔣驥都陞侍講學士藺從善陞洗馬仍在翰林院辦事劉永清邢寬胡種都陞侍講蔣禮陞中允仍在翰林院辦事周叙孫曰恭楊敬都陞修撰王雅等四員都陞編修陳繼陞檢討張禮陞行人署典籍事沈寅陞正字署孔目事蔣暉程南雲都陞從四品俸兼翰林院侍書夏衡宣嗣宗都陞郎中張習蘇鎰王觀陞員外洪益中陞左寺正丘宗楊珵邵暹

陞右寺正蕭湘至胡宜衡陞左評士解禎期至寇原陞
右評士潘文奎他老了著冠帶回去閒住陳中陞員外
陳叔剛陞修撰萬節陞左寺副丘錫還做府學教授支
九品俸梁萼陞府學教授鄒循為翰林待詔朱銓做翰
林侍書辦事吏翁選至李用都做縣丞欽此蓋自是本
院官始以纂脩陞矣然纂修與稽考叅對皆混陞又有
令其閒住者實斷自宸衷故也宣宗實錄據行在禮部
開報具題奉聖旨皇考實錄修完特念他每勤勞英國

公於原號加佐理二字歲加祿米百石楊士奇楊榮陞少師兼職如舊楊溥陞少保兼尚書武英殿大學士欽此隨又奉聖旨英國公張輔等四員已發落了王直王英俱陞禮部左侍郎兼職如舊不管部事李時勉錢習禮蘭從善俱陞翰林院學士苗衷陞侍讀學士曾鶴齡高穀馬愉俱陞侍讀學士周叙尹鳳岐孫曰恭習嘉言陳叔剛陳恂俱陞侍讀曹鼐儀銘王一寧杜寧諸懋陞侍講楊翥董璘楊壽夫林文鍾復張益邵宏譽俱陞修

撰劉球劉鉉洪璵對品改除侍講俱陞從五品俸胡種
邢寬及蕭鎡至靳通共三十三員俱照本等品級各陞
俸一級內有原陞俸的還照例加俸一級陳循徐程王
玉既丁憂且不陞秀才陳學等十八名俱授試中書舍
人給半俸三年後實授辦事顏聚等十一名各照原資
格除授欽此蓋監修及總裁官陞擢自此始英宗實錄
成吏部據翰林院開報具題奉聖旨皇帝實錄修完念
他每勤勞會昌侯孫繼宗陞太傅陳文陞太子太保兼

禮部尚書彭時陞太子太保兼兵部尚書俱文淵閣大學士劉定之陞工部右侍郎兼翰林院學士不管工部事吳節陞太常寺卿兼翰林院侍讀學士柯潛萬安李泰陞詹事府少詹事孫賢劉珣陞太常寺卿仍兼舊職陳鑑劉吉陞侍讀學士丘濬陞侍講學士黎淳陞左庶子童緣劉宣陞右庶子王一夔陞左諭德江朝宗楊守陳陞洗馬彭華尹直陞侍讀彭教徐瓊陳秉中李永通陞侍講耿裕鄭環劉健汪諧吳欽羅璟陞修撰周經陞

編修張元禎既告病罷李東陽倪岳謝鐸焦芳陳音程敏政吳希賢馬麟焦瑞李溥凌暉蔚宣黃清劉詢俱陞俸一級余謙陞太常寺卿林章陞太常寺少卿吳謙陞從四品散官并俸韓定何暹葉玫陳綱王瓊陞本司郎中王佐白直陞通政司知事毛顯陞司寶署永冀舞陞大理寺評事高鑑陞戶部照磨監生史盛等九名除從七品京職譯字官并生員秀才胡清等十二名俱除序班辦事吏曹昂等九名俱照原資格除授事故的罷欽

此蓋是時總裁官少保吏部尚書兼華蓋殿大學士
李賢副總裁官禮部右侍郎李紹纂修官侍讀學士
周洪謨左春坊左庶子王僎右春坊右庶子兼侍讀徐
溥侍讀李本脩撰岳正邢讓王獻騰錄官吏部員外郎
凌耀宗禮部員外郎謝宇中書舍人溫良劉珙鴻臚寺
司儀署丞潘致中序班梁俊周景各以事故去猶具姓
名上故有此旨憲宗實錄成吏部據本院除事故不開
外將見在開報具題奉勅吏部皇考實錄修完念他每

勤勞監修張懋陞太師仍兼太子太師總裁劉吉陞少師華蓋殿大學士餘兼如故徐溥陞太子太傅戶部尚書兼武英殿大學士劉健陞禮部尚書兼文淵閣大學士副總裁丘濬陞太子太保仍兼禮部尚書汪諧陞禮部右侍郎兼翰林院學士如敕奉行欽此又二日奉聖旨監脩總裁張懋等俱已陞了纂修官傅瀚陞太常寺卿費閻陞詹事府詹事俱兼侍讀學士李傑已陞官了仍加俸一級李東陽董越陞太常寺少卿謝遷吳

寬陸簡少詹事俱兼侍講學士曾彥楊守陟左諭德劉
戩王鏊右諭德楊傑梁儲司經局洗馬張元禎南京翰
林院侍講學士劉機楊廷和江瀾俱侍讀武衛張芮劉
忠鄧焮黃珣張天瑞俱侍講楊時暢劉春涂瑞俱修撰
膳錄等官林章龍暹各陞俸一級馬紹榮太常寺少卿
姜立綱太僕寺少卿李通王文琮俱本司郎中王佐王
璉員外郎陸華主事俱工部毛顯大理寺左寺副吳榮
劉祭右寺副胡清徐鶚左右評事黃燦胡清仍加俸一

級李瑄光祿寺署正王臣通政司經歷靳塘蔡振光祿寺署丞何澤朱賓楊全試中書舍人劉安劉學陳倫戶部照磨吳孜翰林院典籍以上官俱照舊辦事原加俸一級者照舊加之張翰陞侍書仍管孔目事監生九名除從七品京職辦事吏八名照舊資格除授欽此孝宗實錄成吏部查事例具題奉聖旨這修實錄官員曾修大明會典陞過的及丁憂未陞的都查職銜并脚色到館年月日期開寫明白來看欽此行准翰林院手本開

坐具題節奉聖旨這纂修實錄重事你吏部便照例擬陞職等例來說欽此隨于奉天門欽奉勅吏部皇考實錄修完念他每勤勞監修張懋加賞大紅紵絲蟒龍一表裏總裁李東陽加支正一品俸焦芳加少師兼太子太師華蓋殿大學士楊廷和加陞俸二品副總裁梁儲陞本部尚書餘如舊勅奉行欽此續該本部將纂修官員等各酌量歷俸并到館淺深查照往年纂修陞職事例擬陞相應職俸通行開坐具題節奉聖旨纂修催

纂侍讀毛紀等十八員并收文書劉訊謄錄沈冬魁等
七員俱陞一級稽考參對修撰呂柟等十二員陞俸一
級喬宗及秀才張保等二十九員名細開因何入館年
月日期來歷脚色務查明白來訖不致乖方丁憂起復
官生劉春等二十二員名還查到館年月日期來訖欽
此于是吏部復將入館來歷緣由具題有旨以營求入
館貪圖陞賞又保送來歷不明責之喬宗等對品調外
任有差而侍講吳一鵬等皆陞調兩京部屬時逆瑾扇

虐惡諸翰林不為禮屈焦芳劉宇輩又嗾之謂文士不習世故摘所同忌者十餘人以擴充政務為名故有此舉非武宗意也而憂居者如侍讀徐穆編修賈詠等猶不免一鵬調南京刑部員外郎穆調南京禮部員外郎詠調兵部主事董玘調刑部主事穆孔暉調南京禮部主事餘各有差及瑾誅諫官以為言乃俱復官正德五年八月也會內閣以本院及坊局多闕員乃疏其有資望者以次陞補喬宗等則本院以善楷書保留云蓋自纂

修以來陞賞事例至是大紊矣復先朝之彛典將有望于今日若乃賞賚按永樂元年五月乙未上以太祖實錄將成命禮部預定賞格禮部以修元史賞例進上覽之曰此述前代興亡之跡今朕紀皇考神功聖德貽範萬世豈可比而同之爾擬議非倫矣遂親定監修官銀百兩綵幣六表裏織金紗衣一襲鞍馬一副總裁官銀八十兩綵幣五表裏織金紗衣一襲鞍馬一副纂修官各銀五十兩綵幣四表裏紗衣一襲催纂兼謄寫官銀

二十兩綵幣三表裏紗衣一襲催纂官銀二十五兩綵幣二表裏紗衣一襲騰寫監生生員儒士各銀十兩鈔三十錠綵幣一表裏騰寫吏各銀八兩鈔三十錠綵幣一表裏催督騰寫者鈔二十錠絹二疋六月辛酉景隆等八十六人如賞格受賜其後太宗仁宗兩朝以至英宗實錄成皆為例獨憲宗實錄成視前或微不同弘治四年定賜監修并總裁官銀八十兩綵段四表裏羅衣一套鞍馬一副總裁銀八十

兩綵段四表裏羅衣一套纂修官銀三十兩綵段四表裏羅衣一套催纂官銀二十兩綵段二表裏羅衣一套謄錄官銀十五兩綵段一表裏辦事吏典鈔二十錠絹一疋各色人匠鈔二十錠布一疋官陞擢事故去任及監生事故去者久近不一賞賚有差乃若修他書宣德以前不過白金文綺襲衣寶鈔之賜而已正統以後始有陞擢而賞賚則視實錄稍殺焉

東宮纂修

洪武十二年八月東宮文學傅藻等受皇太子命編
輯春秋諸國君臣行事始終書成皇太子以聞上賜名
曰春秋本末永樂中東宮命楊士奇徐善述等編纂大
易等直指語見前卷其後東宮纂修蓋無聞焉

翰林記卷十三

欽定四庫全書

翰林記卷十四

明 黃佐 撰

殿試讀卷執事

會典云凡殿試讀卷官內閣於大學士學士等官內具名從該部奏請至日與各衙門該讀卷官詳定試卷次日同赴文華殿內閣官將第一甲三卷以次進讀俟御筆批定出將二甲三甲姓名填寫黃榜又次日早同赴華蓋殿內閣官進至御座前以次拆卷將姓名籍貫面

奏司禮監官授制勅房官填榜畢開寫傳臚帖子內閣
官捧榜出至奉天殿授禮部尚書制勅房官將帖子授
鴻臚寺官傳臚其受卷彌封掌卷官從內閣於本院及
春坊等官并制勅房官內推選與各衙門官相兼執事
本院坊局始不過五人後增至七人遂為例按讀卷官
國初用祭酒修撰等官正統中侍講猶預其後非執政
大臣不得與而其去取之柄則在內閣殿試之明日大
學士擇其中優者三卷圈點以硃明日早持詣文華殿

對上讀之御筆親標其名第又明日即傳臚矣蓋讀卷
止在一日咸病其太亟不能徧觀故本院坊局之執事
者始得試卷時預鑒別其高下為差等以付讀卷官內
閣乃易於裁定葉盛曰景泰二年予為殿試彌封官最
知讀卷事第一甲蓋閣老預屬意於受卷官已皆知之
餘皆分送讀卷諸大臣且率以三分上一等次二等各
置一所少頃閣老收上一等則判二甲次二等則判三
甲也將午三人者持一甲卷詣文華殿進讀午後填黃榜

明早榜出矣蓋辰巳二時榜中人第已定若曰須一一
品量高下次第固有所不能也盛所謂預屬意云者豈
有為而發歟

殿試擬撰策問

聖祖策進士多親製策問洪武四年十八年皆然其後
或命本院儒臣擬撰以進取自聖裁而用之永樂初科
太宗思求博聞之士命學士解縉擇天文律歷禮樂制
度擬撰為題上意士子必為所窘及得曾榮卷記誦詳

盡歎異以為第一人御筆批曰貫通經史識達天文有
講習之學有忠愛之誠擢魁天下昭我文明尚資啓沃
惟良顯哉其第二人周述第三人周孟簡亦皆批評前
此所未有也聞之李賢謂縉謙劉子欽先以問目示祭
祭遂獲首而寘子欽於二甲果爾則縉不可以言無私
矣

考會試

凡會試考試官禮部奏行內閣於大學士學士等官及

詹事府各坊司經局官內具名請奏欽命其同考官於本院侍讀等官及春坊司經局官與各衙門官相兼推選收掌試卷官用制勅房官一員按國初科舉第一場問四書題一道五經義各一道第二場論一道詔誥章表內科一道第三場策一道猶循元制也洪武四年會試陝西河南山東江西湖廣廣之東西福建為行中書者十一俊髦皆集而高句麗之士與焉以禮部尚書陶凱與前侍講學士潘廷堅為主司侍讀學士詹同國子

司業宋濂吏部員外郎原本前貢士鮑恂為同考取中式者俞友仁等一百二十人落第者惟八十人其後罷之十八年復以科舉取士始定今制以待詔朱善前典籍聶鉉為試官取中式者黃子澄等四百七十二人二十一年取施顯等九十五人二十四年取黃觀等三十人二十七年取彭德等一百人三十年取宋琮等三十八人北士皆黜學士劉三吾為考試官竟以是獲罪上乃命本院官考擇下第北士六十一人廷試之語見

覆試類革除庚辰科禮部左侍郎兼學士董倫侍講學士兼太常少卿高遜志為考試官取吳溥等一百一十人永樂二年侍讀學士解縉侍讀黃淮為考試官取楊相等四百七十二人遵洪武乙丑例也蓋自是取士多寡臨期請自上裁云四年取朱縉等二百二十人七年取陳璉等一百人十年左諭德兼侍讀楊士奇右諭德兼侍講金幼孜為考試官取林志等一百人十三年修撰兼右贊善梁潛為考試官取洪英等三百五十人十

六年侍講曾榮為考試官取董璘等二百五十人十九
年左春坊大學士楊士奇為考試官取陳中等二百人
二十二年侍讀學士曾榮為考試官取葉恩等一百五
十人宣德二年右春坊大學士曾榮為考試官取趙鼎
等一百人自設科以來兼取南北士而南士往往數倍
於北宣宗即位始詔禮部歲取百人南士什六北士什
四著為令既而以百乘除又各退五為中數焉五年侍
讀學士李時勉侍讀錢習禮為考試官取陳詔等二百

人八年少保兼大學士致仕黃淮為考試官取劉哲等
一百人正統元年少詹事兼侍讀學士王直侍講學士
陳循為考試官取劉定之等一百人四年禮部左侍郎
兼侍讀學士王直學士蘭從善為考試官取楊鼎等一
百人七年禮部左侍郎兼侍讀學士王英侍讀學士苗
衷為考試官取姚夔等一百五十人十年學士錢習禮
侍講學士馬愉為考試官取商輅等一百五十人十三
年工部右侍郎兼侍講學士高穀侍講杜寧為考試官

取岳正等一百五十人景泰二年戶部右侍郎兼學士
江淵修撰林文為考試官取吳淮等二百人同考試官
有侍講劉儼秩視修撰為高蓋儼科第後於文故也五
年兵部左侍郎翰林院學士兼左春坊大學士商輅司
經局洗馬兼修撰李紹為考試官取彭華等三百五十
人天順元年學士薛瑄通政司右叅議兼侍講呂原為
考試官取夏積等三百人四年學士呂原尚寶司少卿
兼修撰柯潛為考試官取陳選等一百五十人是科會

試舉子不中者奏考官校文顛倒宜正其罪上疑之召
問李賢賢對曰此乃私忿考官實無此弊如臣弟讓亦
不中可見其公上意方回乃命禮部會翰林院考此舉
子驗其學多不能答題意且奏其狂妄遂枷於部前以
示衆羣議方息七年學士陳文尚寶司少卿兼修撰柯
潛為考試官場屋災詔八月補試以太常少卿兼學士
彭時侍讀學士錢溥為考試官而同考試官不改命者
修撰王獻也取吳錢等二百五十人成化二年太常少

卿兼侍讀學士劉定之學士萬安為考試官取章懋等
三百五十人五年太常寺卿兼侍讀學士劉翊侍讀學
士劉吉為考試官取費閏等二百五十人八年禮部左
侍郎兼學士萬安司經局洗馬江朝宗為考試官取吳
寬等二百五十人十一年少詹事兼侍講學士徐溥侍
講學士丘濬為考試官取王鏊等三百人十四年禮部
尚書兼學士劉吉學士彭華為考試官取梁儲等三百
五十人十七年太常寺卿兼學士徐溥少詹事兼學士

王獻為考試官取趙寬等三百人二十年詹事兼學士
彭華左庶子劉健為考試官取儲巘等三百人時有世
家子在選朱墨卷不合華黜之失志者欲甘心焉卒亦
無所害二十二年守臣有言中士日衆而額如故者事
下禮部集議南北仍各退二以益之太子太保兵部尚
書兼學士尹直右諭德吳寬為考試官取程楷等三百
五十人弘治三年禮部尚書兼文淵閣大學士徐溥少
詹事兼侍講學士汪諧為考試官取錢福等三百人六

年太常少卿兼侍講學士李東陽少詹事兼學士陸簡
為考試官取汪俊等三百人九年兼侍講學士謝遷
侍讀學士王鏊為考試官取陳瀾等三百人十二年太
子少保禮部尚書兼文淵閣大學士李東陽掌詹事府
事禮部右侍郎兼學士程敏政為考試官取倫文叙等
三百人時敏政有異議同考試官給事中林廷玉發其
事戶科給事中華泉劾之敏政遂得罪十五年吏部左
侍郎兼學士吳寬侍讀學士劉機為考試官取魯鐸等

三百人十八年掌詹事府事太常寺卿兼學士張元禎
左春坊大學士兼侍讀學士楊廷和為考試官取董玘
等三百人正德三年少傅兼太子太傅戶部尚書武英
殿大學士王鏊掌詹事府事吏部尚書兼學士梁儲為
考試官取邵銳等三百五十人六年少傅兼太子太傅
吏部尚書武英殿大學士劉忠掌詹事府事吏部右侍
郎兼學士靳貴為考試官取鄒守益等三百五十人九
年少傅兼太子太傅吏部尚書謹身殿大學士梁儲學

士毛澄為考試官取霍韜等四百人十二年太子太保
戶部尚書兼武英殿大學士靳貴少詹事兼學士顧清
為考試官取倫以訓等三百五十人十五年禮部右侍
郎兼學士石瑄侍講學士李廷相為考試官取張治等
三百五十人蓋會試去取在各房同考試官而叅定高
下則考試官柄之歷朝應用不同與凡取士多寡皆不
可不知故備記如此若同考試官正統以前猶參用外
官教職景泰後始純用京職內則本院外則六科部屬

行人司官弘治以來定本院官九人餘惟六科部屬得與共十四人正德辛未以易書詩房卷浩繁各增其一本院官十一人與六科部屬共十七人云按國朝以文取士大概以辭達為本天順間晚宋文字盛行於時如論學繩尺之類士子翕然宗之文遂一變侍講學士丘濬每考試凡怪詞險語皆痛斥之怨排不恤也及為祭酒尤諄諄為學者言之文體乃復渾厚成化乙未會試學以至乎聖人之道論舉子桑悅卷有我去而夫子來

也等句濬黜之他日會試悅策有曰腹中有長劍日日
幾回磨檢討吳希賢復黜之前輩取士不苟如此

覆試

洪武三十年丁丑六月辛巳朔上御奉天殿策試下第
舉人先是禮部會試者多而中式者少被黜落者咸以
為言上命翰林儒臣考下第卷中擇文理優長者得六
十一人至是復廷試之擇韓克忠為第一仍賜克忠等
進士及第出身有差乙酉以克忠為修撰第二人王恕

第三人焦勝為編修七月命太常寺丞張顯宗署國子
監祭酒事因命克忠署司業事其見寵擢如此永樂二
年上臨軒策士傳臚之明日進會試所選副榜士於廷
親試之上御右順門命侍講學士楊士奇金幼孜諭旨
令就試者從容盡所蘊毋苟且取具命光祿給食中官
夕給燭遂親拔三人命進學翰林餘第為二等付吏部
除學官其第一人則周翰也預修永樂大典七年除典
籍云按宣德間副榜舉人得冠帶讀書太學蓋循此制

然不可考正統後副榜始不復廷試矣楊士奇云宣德丁未以前有十五科前此南北士合試未有北士占首選者有之實自丁未始猶不數覆試之科王直云自洪武辛亥至正統丙辰為二十科則并韓克忠一榜數之也

考兩京鄉試

凡順天府應天府鄉試本府以考試官請命與會試同蓋重畿甸以為天下先也按洪武庚戌京闈主考為前

御史中丞劉基侍書御史秦裕伯同考為侍讀學士詹同弘文館學士睢稼起居注樂韶鳳尚寶丞魏潛國史宋濂辛亥京闈主考則兵部尚書吳琳國子司業宋濂也水樂癸未命侍讀胡廣編修王達為應天府考試官賜宴於本府自是遂為例正統戊午侍講學士曾鶴齡主考順天府鄉試初試之夕場屋火試卷有殘缺者有司懼罪不敢以更試為言惟欲請葺場屋以終後兩試鶴齡曰必更試然後百弊滌至公著不然雖無所私亦

招謗朝廷何惜一日之費以成此盛舉哉有司具二說以進命下悉如鶴齡所言衆皆懼服得士亦審景泰丙子洗馬柯潛奉命主考應天府鄉試舟維淮揚有舉子鬻私者暮夜投潛潛叱之彼固以請以所賂遺置前潛怒命執付有司懲以法成化甲午左庶子黎淳主考順天府鄉試有試卷竒甚後場不類疑有弊勾稽墨卷果得騰錄生截卷狀移外簾按其事而取是卷為解首則名士馬中錫也此三事皆可為應變之法景泰庚午

侍講學士劉鉉主考順天府及揭曉第一人劉宣乃盧龍軍士也同事者欲更之鉉爭曰朝廷立賢無方不可乃止時論躉鉉丙子順天府主考為右春坊大學士劉儼侍講學士呂原時少保兼大學士陳循王文用事循子瑛文子倫入試俱不中二人論奏儼原不公有旨令翰林并科道覆考瑛倫文字遂以為合格得特賜舉人儼等問罪還職禮科給事中張寧劾奏循等罪狀乞黜不報未幾英廟復辟文誅循戍鉄嶺瑛倫皆為民此科

試之大變也

試錄程式文字

國朝鄉試小錄會試錄進士登科錄具有成式蓋科舉自兩京外鄉試付之藩臬以為未信也會試則以名籍付禮部考試付翰林暨於親試則有殿最而無黜陟蓋以為可信矣其所刻程文自鄉試以至於殿試皆宜刻士子所作庶為傳信流弊之極至于制策亦多代筆豈所以教之忠歟按洪武甲子鄉試乙丑會試初為小錄

以傳然惟列董事之官試士之題及中選者之等第籍貫經籍而已其錄前後雖有序然猶未錄士子之文以為程式也次科戊辰始刻程文自是遂永為定式但此後五科其間命官列銜尚或隨時不一永樂以後其制始一定而不更易矣然永樂中各省鄉試猶有儒士主考品官同考者其序文亦不拘篇數景泰中序文禁稱公考官上用實授教官序惟前後二篇以兩京為法也然兩京序文稱臣獨與會試同云按初場例出四書義

三道正統元年會試出大學論語中庸而不及孟子十年會試出中庸大學孟子而不及論語成化元年順天府鄉試出論語二道孟子一道而不及大學中庸其後定大學中庸內量出一道論語孟子各出一道遂為例二場洪武四年以射禮論為題其後止用經書聖製書中成語三場策問前輩惟以經史疑難及國家之大者言之其後始有出於經史之外并及瑣屑隱僻若序文則弘治五年順天府鄉試猶具歲月後皆不然也葉盛

曰文衡之任亦難矣言語文學不足以變士習服士心亦漫浪為之耳正統己未會試王抑庵主考試第二名張穆兵馬策其原卷起語云兵所以衛民也非兵無以安夫民之生馬所以資兵也非馬無以足夫兵之用會試錄云兵以衛民非兵無以安民生馬以資兵非馬無以足兵用兩句減去八字抑庵筆也自是舉子以造語簡嚴典重為尚然抑庵又稱永樂辛丑楊文貞公司會試文衡務先典實之作以洗浮腐之弊喜曾鶴齡諸作

多梓行之至今評程文者以是科為最蓋洪武水樂間
程文體皆渾厚不特是科而已誠宜錄出以正文體而
變士習至若登科錄水樂甲申二甲刻所對策十餘篇
其後惟刻首甲三人所為者正德三年二甲第一人三
甲第一俱刻策事出焦芳輩非制也燕對錄曰正德六
年四月十三日講畢復召至煖閣叩頭畢上手取會試
錄一本付司禮監太監張永授臣東陽等內有白紙票
粘於紙上者三皆指摘所刻文字錯誤處上曰今欲別

有施行但念衙門體面恐不好看但與先生輩知之耳
臣東陽捧錄叩頭出至煖閣門外留寘案上永令內臣
送至內閣是年大學士劉忠累疏辭疾未允強起主考
試事出院後即乞省墓已得請是日陞辭聞此事而去
比抵家復具疏乞休致蓋已有先入之說矣科舉文字
不獨關係氣運而儉人投間一至於此誠不可以不慎
也

考武舉

凡武舉第三場考試官兵部命如兩京鄉試之制正德三年始刻錄前後有序賜會武宴一如文試九年十二年亦如之惟十五年兵部尚書王瓊變其制止用策一道刻文三篇本院官一員并兵部公侯伯皆為考驗官今照舊規出策二道論一道云

考選庶吉士

考選庶吉士始自洪武乙丑迨永樂初益重其事然其詳不可考大率每科必選宣宗時合三科進士親試之

拔二十八人為庶吉士如甲申之制正統丙辰上親考選庶吉士於文華殿取蕭鎡等十二人已未以後罷之至戊辰始純選北方及蜀士為庶吉士被選者萬安等二十人親試也自是其事付內閣例取平日所為詩文或繙閱殿試卷兼採名實行禮部使人延請至東閣前會同吏部試以古文暨詩各一篇合格者改送本院讀書景泰辛未選吳匯等二十五人甲戌選丘濬等十八人皆兼選南北士天順庚辰三月英宗御文華殿召李

賢諭曰永樂宣德中常選庶吉士教養待用今科進士中可選人物端重語音正當者二十餘人為庶吉士止選北方人若南方人有似彭時者方許選取賢出以語時疑賢欲抑南人故為此語因應之曰立賢無方何分南北賢曰果上意也奈何已而太監牛玉復傳上命如前令內閣會吏部同選時對牛曰南方士豈獨時比優於時者甚多也牛笑曰且選來看是日考選取十五人南方止三人而江西惟張元禎得與焉天順甲申選李

東陽等十八人自是皆兼選南北士成化丙戌選林瀚
等二十四人已丑選費閏等十五人戊戌選梁儲等二
十八人丁未選程楷等三十人弘治癸丑選顧清等二
十八人是科清等已發各司觀政後乃得旨取各司考
選丙辰選顧潛等二十人壬戌選胡煜等二十人乙丑
選崔銑等三十人正德辛未選許成名等三十三人丁
丑選汪佃等三十四人辛巳選廖道南等二十四人天
順以前一甲三人與庶吉士同讀書成化後久廢至弘

治丙辰始復舊規自後皆因之

教書

洪武中宋濂永樂初解縉皆常領庶吉士特與之講究爾未嘗抗顏為師也宣宗時親教庶吉士考其文藝與永樂時同至正統戊辰乃顯命詹事兼侍講學士劉鉉祭酒王詢教書自後以為例內閣於學士及詹事府坊局等官擇資望深者二員請旨送本院教書謂之開館是日自內閣而下皆醵金為燕會云

考保舉諸科

凡各處舉到經明行修懷才抱德之士宣德以前送本院考試後止令吏部考又其後諸科亦廢正統十四年詔各處舉到儒士照水樂年間事例送本院嚴加考試選用不中者發原籍為民葉盛曰水樂中清江喻行之以文學舉試記里鼓正統中馮益於試事皆不知所謂莫能措一辭所謂名浮於實君子弗貴者歟如復諸科考藝觀德付諸翰林可也

考歲貢生員

洪武十六年二月丙申命天下學校歲貢生員時諫官有言命禮部榜諭天下府州縣學自明年為始歲貢生員各一人正月至京從翰林院試經義四書義各一道判語一條中式者入國子監不中者罰之故有此命也會典曰凡考試歲貢生員禮部奏請出題本部官赴內閣領題試畢送卷本院官批定去取送部奏請施行嘗聞編修張元禎考校精覈歲貢士鮮入格者時服其公

云

考教職

會典云凡考試願就教職舉人監生吏部奏請出題本部官赴內閣領題試畢送卷本院官批定中否送部奏請施行又云凡各處儒學訓導九年考滿吏部出題考試初場四書本經義各一道二場論策各一道印封文卷送內閣委本院官批定去取送部奏請施行

考汰官吏

洪武二十九年四月命本院官會同禮部考國子監六堂師弟子甄別高下送吏部以次錄用其後不知何時遂廢永樂中有詔汰在京諸司冗官左贊善陳完時掌春坊事即操筆書某當留某當去衆服其明決然此後亦不聞焉會典云天順八年奏准吏部都察院會同內閣考察在京五品以下文職并在外布按二司官有不公者許令科道官指實劾奏又云宣德七年勅吏員三考滿當授官者吏部通引於內府會同六部都察院翰

林院堂上官出題南北類試其文義粗曉行移得當書
札不謬三事俱可取者為一等二事可取者為二等俱
不可取者放回為民當差可齋雜記云東閣為翰林官
會揖處一日各部堂上官會考三考吏來集閣下諸同
寅遂聯步而出周修撰旋口誦兩句云爾來閣下考三
考我去家中眠一眠語雖戲而對亦切蓋當時考吏必
集閣下於此可見

清理武官貼黃

會典云凡兵部清理武官貼黃奏請命學士等官一員
同該部及法司堂上官於闕右門清理本院官專管撰
述

考就試軍士

會典云凡該衛軍士告願科舉者兵部奏送本院出題
考試批定中否送本院施行按景泰元年盧龍軍士劉
宣弘治五年府軍前衛軍士姚學禮皆發解第一然則
軍士中不可謂無人要甄鑒之爾

稽考監生課簿

會典云凡國子監生課簿按月送內閣稽考

稽考精微文簿

精微文簿所自置殆不可考按永樂元年司禮監請如舊制鑄出入精微印從之則是廢而復置也會典云凡五府六部都察院等衙門關給內府精微文簿開寫日行事務註銷前件按月奉送本院稽考年終類送司禮監交收

稽考四裔館課程

洪武十五年命侍講太原潔等編華裔譯語以元無文字但借高昌之書制蒙古字以通天下之言至是乃命原潔與編修馬亦黑以華語譯其語天文地理人事物類服食器用靡不具載復取元秘史參考紐切諧音既成刊行之譯字官隸本院蓋始於此二人蒙古產也永樂中上選太學生年少者習四裔諸蕃字諸生多不欲輒生謗議上怒將罪之學士楊榮力救得免遂命榮掌

之榮訓勵得宜自是帖服率皆有成有官至五六品者
會典云凡四裔番夷翻譯文字永樂五年設四裔館內
分八館曰蒙古女直西番西天回回百夷高昌緬甸選
國子監生習譯宣德元年兼選官民子弟委官為教師
本院學士稽考課程後內閣委官提督弘治初奏准科
目出身四品以上二員提督其官生公會按月從本院
印給仍繳送稽考及食糧授職從吏部禮部奏會同內
閣出題考試中否仍從該部奏請施行凡四裔館習譯

監生子弟舊例月支米一石會官考試一年通習者與
冠帶全不通者黜退正統元年奏定考中一等者冠帶
為譯字官又一年再考中授職弘治三年奏准子弟不
許別圖出身三年後考中食糧月給米一石又三年考
中冠帶為譯字官又三年考中受序班職事初試不中
者許再試三試不中者黜為民監生初入館照坐監例
食糧三年考中食糧一石家小糧仍舊又三年考中冠
帶又三年考中授從八品職事三試不中者送回本監

別用其曾習者非精通譯字不准應試按自後提督官
例用太常寺卿及少卿而景泰天順間譯字官多有取
進士者甲申庶吉士劉淳景泰庶吉士吳貞皆自譯字
官發身云

考校僧道

洪武十年九月令僧徒皆通般若心經金剛般若經楞
伽經命學士宋濂考校之不通者令還俗二十四年六
月用翰林儒臣議命禮部清理釋道二教凡府州縣等

觀雖多但存其寬大可容衆者一所併而居之母雜處於外與民相混餘寺觀為叢林以居貧民宣德九年僧道行童請給度牒者甚多命僧道官取勘禮部同翰林院官禮科給事中及僧道官考試能通大經給與度牒景泰間三年一度僧至數萬天順初如期來集大學士李賢言于上曰此輩有損無益宜令十年一度上從之著令按僧徒之盛莫甚於今日而道流次之蠹國侵民宜事沙汰考校僧徒宜如洪武中所定三經道士則老

莊列三子可也試使儒臣定議通行天下委風憲官考校中者宜分府州縣酌量其數而差等之不中者勒令還俗所居惟併為一所餘皆拆毀為叢林以居貧民一如洪武二十四年之例是不惟於國家風化有益而所謂釋與道者亦自不違其教矣聖君在上賢公卿在下必有以處此者

翰林記卷十四